



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8 Yangia anidakangma : Tir Yimyim tir yimyim TAPAK 3

Myanmar military lenirtemi emergency atsulangtsü

Tripura nungeri Mizoram yaritsü molunga lir: TIPRA chairman Pradyot



VOL. XVIII NO. 289 (ADOK 289) DIMAPUR

TENTONÜ (MONDAY)

LUROI (AUGUST) 02, 2021

₹ 5.00

Covid nisung 73 dak putet, 51 taneptsü angu, 4 asü

Kohima, August 1, 2021 (TYO): Deobarnü Nagaland nung nisung 73 dak COVID-19 aliba putet aser parnok züingsema nisung ajak agi 27,945 kumogo. "Tanü nisung 73 dak COVID-19 putet. Parnokji Kohima nung 39, Dimapur nung 17, Mokokchung nung 9, Phek nung 3 aser Kiphire, Longleng, Mon, Tuensang o Wokha nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Deobarnü COVID-19 puteta alir nisung 51 taneptsü angu. Parnokji Kohima nung 21, Dimapur o Mokokchung nung ter asemsem (13) aser Phek nung 4 lir. Parnok züingsema taneptsü angur 25,244 kumogo" ta paisa ashi.

Nagaland nung COVID-19 nungi taneptsü angurji 90.33% lir aser tang nisung 1,344 anepaludar, ta Dr Kikon-isa ashi.

Deobarnü COVID-19 puteta alir nisung 4 asü. Tasürtemji Dimapur nung ana aser Kohima o Tuensang nung kaka liasü aser parnok züingsema tasür ajak agi

Nagaland Civil Secretariat aser Directorate nung inyakertem atema metetdaksür

Dimapur, August 1, 2021 (TYO): Nagaland Civil Secretariat aser Directorate tem nung COVID-19 indang vaccine dose ka dang magirtemi COVID-19 negative test report bener arutsüla ta tanü Nagaland sorkari metetdaksüogo.

Vaccine magirtem anogo 15 shia RT-PCR/TrueNat/CBNAAT ajanga COVID-19 negative test report bener arutsüla aser ibaji

NIPF-i Assam aser Nagaland sorkar nem tenüngsang agütsür

Dimapur, August 3, 2021 (TYO): July 31, 2021 nü Dimapur nung Assam aser Nagaland sorkartemi tenangzüktep nung sign asüba atema tenüngsang agütsür, ta Nagaland Indigenous People's Forum (NIPF)-i metetdaksü.

Nagaland aser Assam Chief Secretary temi Nagaland Deputy Chief Minister Y. Patton aser Assam Minister Ranooj Pegu na

NSF lennir tejentem senden amentsü

Dimapur, August 1, 2021 (TYO): August 4, 2021 nü Naga Students Federation (NSF)-i Seniors Consultative Meeting ka alitsü ayongzüker.

Sendenji Hotel Japfu, Kohima indang Conference hall nung amentsü aser NSF dak sendakba onüktem benoka lemsateptsü. Anungji NSF lennir tejen ajak iba

570 kumogo saka nisung 14 bo tanga tashidak ajanga asü, ta paisa metetdaksü.

"Tang tashi nung COVID-19 alitsü akok ta temolung melemi bilemba sample 264,625 tendangogo. RT-PCR ajanga 102,854, TrueNat ajanga 68,073 aser Rapid Antigen Test ajanga 93,698 tendang" ta Dr Kikon-isa ashi.

"Honibar tashi nung Nagaland nung nisung 617,990 nem COVID-19 vaccine indang dose 768,950 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,811, healthcare workers 15,966, arishi küm 45 ser temapur 185,347 aser arishi küm 18 nungi 44 tsüingda alir 355,866 lir" ta paisa metetdaksü.

"Vaccine agirtem rongnung nisung 150,960-i dose anaprong agiogo. Parnokji frontline workers 39,602, healthcare workers 12,440, arishi küm 45 ser temapur 98,595 aser arishi küm 18 nungi 44 tsüingda alir 323 lir" ta Dr Thurr-isa ashi.

parnoki sorkar testing facilities nung angati tendangtsü, ta sorkarisa metetdaksüogo.

Maneni, July 31, 2021 sülen vaccine magirtem indang itasen sota mayutsü, ta sorkarisa ashi.

Guahati High Court Kohima bench-i July 28, 2021 nü tetuyuba agütsüba nung ajemdaker Nagaland state sorkari iba osang metetdaksüogo.

lia tenangzüktep agibaji state anaprongi yimjung bener arutsü atema alizüing atongba ka lir. Iba ajanga arrtsülen alirtem aser talisa Tsurangkong Valley nung alirtem ajangzüksü, ta Media Cell, NIPF sangdong ka nung ashi.

Assam aser Nagaland tsüingda mapang shia senden amenba ajanga arrtsülen mepetmesü madoktsü ta NIPF-isa metetdaksü.

senden nung arua adentsü mepishir, ta President Kegwayhun Tep-i sangdong ka nung ashi.

July 31, 2021 nü NSF 2021-23 indang official meeting tanabuba nung lemtetba ama iba senden ya ayonger aser NSF Platinum Jubilee indang onük jembitsü, ta paisa ashi.

Nagaland sorkari Unlock 4 nung talenba kar salatsür



Nagaland nung Unlock 3 mapang Dimapur jila tiyongtsü nung agiba noksa ka angur. (File)

Dimapur, August 1, 2021 (TYO): July 31, 2021 nü Nagaland nung High Powered Committee on COVID-19-i tensa meyipa reprangdangba den Health & Family Welfare Department aser Districts Task Force temi ashiba angur Unlock-4 atema telemetba kar agiogo.

August 2 nungi 18, 2021 tashi atema talenba kar salatsür, ta State Executive Committee Chairperson aser Chief Secretary, J Alam-i Deobarnü metetdaksü.

Unlock-4 mapang dokantem

anepdang 6:00 ako nungi nikongdang 6:00 tashi lapoktsü aser aonung curfew aonung 8:00 ako nungi anepdang 4:00 tashi alitsü, ta J Alam-i ashi.

Aonung curfew mapang dak alaka mapang ajak nung takeaways / home delivery outlets lapoktsü melar, ta paisa ashi.

Sorkar aser nika bus service tenzüksü saka gari nung nisung 50% dang amentsü melar aser driver o attendant tem COVID-19 vaccine agir alitsüla. Aji ta mesüra, anogo 15 mabensaba COVID-19 negative test report

alitsüla, ta Chief Secretary-isa metetdaksü.

Temalen shia aliba inyakyim Inter-District bus service/ Taxi service senzütsü melar aser passenger temji COVID-19 vaccine agirtem asütsüla. Ajisüaka, COVID-19 magirtem süra ghonda 72 tsüingda agiba COVID-19 negative test report alitsüla, ta paisa ashi.

Maneni, Home Department-i SOP tejangja metetdaksütsü aser District Task Force (DTF) temia pei pei sasep nung telemetbatem agitsü, ta Chief Secretary, J Alam-isa ashi.

NSCN/GPRN-i India sorkar dang mepelaba sayua lungkak aittsü AUG 2 AYATERM NUNGI AUG 3 ANÜNGDANG 12 AKO TASHI DOKAN AJAK SHIBANGTSÜ

Dimapur, August 1, 2021 (TYO): August 3, 2015 nung Framework Agreement (FA) sign asüba sülen küm trok süiaka India sorkari nangzüksüba meinyakba atema tejashi sayua August 3, 2021 nü lungkak aittsü, ta MIP, NSCN/GPRN-i sangdong ka nung metetdaksü.

India sorkari Naga nunger putiotsü otsü aser yimten temeten agizüka FA nung sign asüba atema tenüngsang agütsür saka idakji iba onük metembanger aser nangzüksüba ama inyaksüla, ta parnokisa ashi.

Küm 6 tashi süiaka India sorkari Framework Agreement atema ola madokba atema tejashi sayua August 2, 2021 ayaterm 12:00 nungi August 3, 2021 anüngdang 12:00 ako tashi

Nagalim ajunga nung dokan aser shishilembadak ajak shibangtsü. NSCN/GPRN-i dokan kiburtem aser shishilembar ajak dang iba nung yariteptsü mepishir, ta MIP, NSCN/GPRN sangdong nungsa metetdaksüogo.

Maneni, NSCN Regional authorities aser Civil Society Organizations (CSOs)-ia yariteptü mepishir, ta parnokisa ashi.

Centre-i 'satellite imaging' ajanga Northeast state tem arrtsü ladangtsü

Guwahati, August 1, 2021 (Agencies): Centre-i satellite imaging ajanga Northeast state balala indang arrtsütem ladanga ken o tem angatetteptsü.

Department of Space (DoS) aser North Eastern Council (NEC) yaritepa North Eastern Space Application Centre (NESAC) nem iba mapa lemszüksüogo ta osang

angazüker. NESAC-i space technology teyari agüja Northeast tesem nung terenlok mapa inyaker/ Assam-Mizoram arrtsü anasa

Lailapur nung mangatettep adoka raradang Assam Police 6 aser civilian ka asüba sülen state balala tsüingda arrtsü ken o tem tasen kümshia jembir.

Home Minister Amit Shah-i ita ishika tejakdang satellite imaging ajanga state balala tsüingda arrtsü ladangtsü tebilemba lemsatepa liasü.

Northeast nung NESAC ajanga inter-state borders aser forests mapping asütsü aser iba sülen state tem tsüingda arrtsü ladangtsü akok ta Amit Shah-i tebilemba shidanga liasü.

COVID-19 indang R-Value teimba akümer: AIIMS Director

New Delhi, August 1, 2021 (Agencies): India nung COVID-19 wara tasembuba adoktsü lendongbang nung alidang AIIMS Director Dr Randeep Guleria-i 'R-Value' atema küm dangtsü metetdaksüogo.

R-factor ya reproduction rate dang ajar aser iba ya COVID-19 alir nisung ka dak nungi tangar dak virus menaba lir.

Coronavirus indang R-value teimba akümer aser iba ya azüoktsü atema sample tendangtsüla, bushitsüla aser anepalutsüla ta Guleria-i ashi.

"R-Value ya .96 nungi 1 tashi atur aser iba ya tebilemstü khuret ka lir. Iba tetezü Covid alir ka dak nungi tangar dak menaba teimba akümba lir" ta paisa metetdaksü.

"Kerala nung COVID-19 menaba kanga teimba kümogo. Tesüiba anogo ishika tsüingda Kerala nung nisung 20,000 tema dak COVID-19 putetba osang lir aser iba ya asadangtsü nüngdaker" ta Dr. Guleria-i ashi.

"Tetenzük nung Kerala-i wara kanga junga azüok aser vaccine agütsüba maparen kanga junga inyak. Ajisüaka, linük kübok

tangalen den medemdra, nisung teimba dak COVID puteter. Iba ya jungjunga asadangtsüla aser kanga menatepa ya variant tanga ka ajanga asü ta bushitsüla" ta AIIMS Director-isa ashi.

Taoba ghonda 24 tsüingda India nung nisung 41,831 dak COVID-19 putet ta Ministry of Health and Family Welfare-i Deobarnü metetdaksüba sülen Dr. Guleria-i iba osang metetdaksü.

India nung positivity rate 2.42% nung lir ta Ministry-isa ashi.

State nung Assam Rifles temi nüburtem yari



Dimapur, Luroi/August 01 (TYO): Phek district kübok New Thewati yimtsüing nung July 31, 2021 nü nisung kar kanga mejungi yirur lia HQ IGAR (North) kübok Assam Rifles, Phek Battalion nungi doctor temi yaria first aid agütsü.

New Thewati yimtsüing nung truck ka lendong ajurua mükepoker aser yangji mena alir nisung pezü kanga mejungi yirua liasü. Iba lendong atalokba osang angashia Assam Rifles, Phek Battalion nungi medical team ka arrsanga lendong atalokba tesemi oa yirur alir nisung pezüprong nem first aid agütsü, saka par pezü nungi nisung asem temang kangasa mejungi yirur aliba ajiteta dangaleni anir aotsüsa akum.

Assam Rifles temi par asem ya CHC Meluri tashi anir oja liasü, aser iba mapang

tsüingsang majungba den anentsüh agi lenmang shibanga aliba ajunga müreka ao. Assam Rifles temi mapang shidak nung teyari agütsüba ajanga nisung takum kata mesama. Iba ama mapa tajung inyakba atema lendong ajurua aliba kinunger aser yimdaklirtemi Assam Rifles, Phek Battalion dang pelaba lemsatepa liasü.

Maneni Phek district kübok Lephori, Ziphu aser Phek town nung anentsüh alua lenmang shibanga aliba, HQ IGAR (North) kübok Assam Rifles, Phek Battalion ajanga July 31 aser August 1, 2021 nü müreketja liasü.

Tsüingsang majungba den maneni tzunglu aruba ajanga Lephori, Ziphu aser Phek town nung anentsüh alua Jessami - Akhen, Akhegwo - Avanghku aser district headquarter aser

NH-29 sendaktepba lenmangtem nokdanga liasü.

Anungji Assam Rifles, Phek Battalion ajanga JCB den sepaitem yoka lenmang ya lapokja liasü.

Maneni Mon jila nung tawa renemba Mon Vales College atema Assam Rifles temi Ceiling fan agüja liasü. Mon nung shisaliok tajung agütsütsü nükjidong nung tetsüing ajemoktsü merangba mapang HQ IGAR (North) kübok Assam Rifles, Mon Battalion ajanga iba teyari ya agüja liasü.

Assam Rifles temi 'Friends of the North East' motto nung ama liteta Mon nung nija (private) college mezüingbuba nem iba ama teyari agütsüba ya College indang principal, tesayur aser Management Committee ajanga pelashishia agizüka liasü.

Kohima nung yimtsüing pezü nung FIG tentet

Kohima, Luroi/August 01 (TYO): Agriculture Department, Nagaland tawabangba kübok Service Provider "The Green Caravan" ajanga mapa kuma inyakba Mission Organic Value Chain Development - North Eastern Region (MOVCD-NER) phase-III sentong tenzüka Farmers Interest Group (FIG) tenteta liasü.

Item FIGs yagi ano Farmer Producer Organization/ Company tentetsü, ta "The Green Caravan" indang chairman, Richard Belho-i ashi.

Iba sentong kübok state nung aluyimer 10,300 shi lir aser The Green Caravan yagi Dimapur, Kohima, Mokochung, Zunheboto, Mon, Longleng aser Tuensang district tem awajemtsü, aser tsünüsempongtsü shimteta aliba ya jenjang aketba süngmok, potato, mersü amala yokya-yokjitsü asoshi alitsü, ta pai ashi.

Iba project kübok district 7 nung aliba yimtsüing 100 dak tema awajemtsü, ta pai ashi.

Kohima district nung MOVCD-NER Phase-III kübok yimtsüing 16 awajemtsü aser FIG tentetba nung yimtsüing mezüingbubaji Jakhama yimtsüing ya alitsü, kong tajangzük anguba aluyimer 50 dena liasü.

Iba yimtsüing nung FIG tentetba sentong ya Kechaseno Kulnu-i sarasadema tenzüik, kong Jakhama yimtsüing nungi 'lead farmer' Deizenuo Viswentso-i ashiba agi, aluyimertemi mozü mamshi alu ayim (organic farming), ta ashi. Süngmok lu ayimba mapang

timtem ajuruba indang lai iba sentong nung lemsatepa liasü. Laisa aluyimba maparen temelaba nung inyaksü atema hadir balala nüngdakba indanga shia liasü aser Direct Benefit Transfer (DBT) mezüingbuba installment nguogo, ta metetdaksü.

"The Green Caravan" indang project associate, Manen Ozukum aser Thejaseto Terhujah nati MOVCD-NER program ajanga tajangzük anguba indang rateta ashi aser parnok ya FIG telok asem sadangba sülen sentong tembanga liasü.

Aluyimba tsütsü terenlok asadangtsü atema farm inspection session ka agia liasü, aser iba mapang tzunglu mapang shidak nung maruba timtem indang aluyimer temi lemsatep aser mapang shidak nung tim yimya nung tzi mesüoktsütsü asoshi parnoki akok tashi meranga lenmang danga bushiba indang shia liasü.

MOVCD-NER kübok yimtsüing tanabuba semdangba ya Kigwema yimtsüing liasü. Yangji FIG tentetba sentong nung project associate Manen Ozukum menden liasü aser aluyimer Seyievillhou Yhokha-i sarasadema sentong tenzüik.

Iba sentong nung "The Green Caravan" indang mendenpuba Richard Belho-i MOVCD-NER indang rateta jembiba mapang organic state akumtsü nükla aliba lemsatepa liasü.

Iba yimtsüing nung FIG tentetba sentong ya project associate Thejaseto Terhujah-i agi aser lokti sarasadem mapang agia sentong tembanga liasü.

Iba sentong nung DBT manguba indang aluyimer kari lemsatep aser project associate temi department nem iba osang sangoktsütsü shia liasü.

Parnoki awajemba yimtsüing tasembuba ya Mezo Basa liasü, kong FIG tentetba sentong nung project associate Manen Ozukum menden liasü aser aluyimer Kezha K Koutsu ajanga sarasadema sentong tenzüik. Iba yimtsüing nung FIG tentetba sentong ya Thejaseto Terhujah ajanga agia liasü.

Iba sentong nung aluyimer kari DBT manguba indang lemsatep aser project associate temi department nemo sang sangoktsütsü ashi.

Iba sülen parnoki Jotsoma yimtsüing semdanga FIG amenokba sentong agiba nung project associate Manen Ozukum menden liasü aser aluyimer nungi Roko-i sarasadema sentong tenzüik.

Iba sentong nung MOVCD-NER Phase-III indang rateta jembiba mapang Richard Belho-i lokti den The Green Caravan ajanga tang teinyakdak mapatem indang lemsatep aser akokba lenmangtem nung yariteptsü shia liasü. Iba yimtsüing nung FIG tentetba sentong ya Thejaseto Terhujah-i agia liasü.

North East region nung commercial organic farming renloktsü atema schema ka 2015 küm Ato Kilonser Narendra Modi-i tenzüka liasü aser mapang tatsüka lir iba scheme dang ya "Mission Organic Value Chain Development for North Eastern Region" (MOVCDNER) ta tenüing jaloktsü.

OFFICE OF THE
AO STUDENTS' CONFERENCE (AKM)
H.Q. Mokochung - 798601 : Nagaland
Regd. No. Rs. 3072
"For the Nation"

AO KAKETSHIR MUNG DANG (AKM) MENDENTI NUNGI TSÜNGREMMONG SALEM TULU LEMSATEPER

Tsüingüm mongpu melena arudang Aor changa-laza, nuza-azen ajaki penpua aser yongya ataba nüngjatet 'Tsüingremmong' ajaki metsünga reta mungdini ta ayongzük.

Tanü tensa wara mopung majungba ajanga aki ama longsolongben benjongmong ka mesütetsüsa mapangi tuyu nung AKM-i sasa nemjema bilemer. Asen tsürapuri iba mapang tsünüsempongtsü alu sünga tsünüteta yur pei tamang yari tsüingrem dang temoatsü meshiba benjongmong nung asenokia iba mapang ya metsünga reta Tsüingrem dang temoatsü meshia mongdini ta AKM-i Aoli sanger ajak dang ayimoktsür.

NUNG DOKYANG A.O.
Tir

LONGPOZEM JAMIR
Sobaliba Zalur

BJP Mkg ajanga Ao kin dangi Tsungremmong salem aben

Dimapur, Luroi/August 01 (TYO): Aotsür-Aor ajak dangi Bharatiya Janata Party, Mokochung District ajanga Tsungremmong benjong salem abener, ta BJP, Mokochung District tir Imolemba Jamir aser tongti zülur S. Moa Imsong nati sangdong ka ajanga ashi.

COVID-19 tashidak wara mechi asen kini iba benjong memungtetba atema kanga sasar. Saka iba Tsungremmong tenüing nung BJP, Mokochung district ajanga Naga nung ajunga atema yimjung, terenlok asoshi asen Ato Kilonser Narendra Modi aser asen BJP Nagaland State tir aser Minister Temjen Imna Along Longkumer na nükla den külemi Tsüingrem

temoatsü jazük. ta ashi. BJP, Mokochung District ajangasa karyakartas ajak dang iba Tsungremmong ya sarasadema amungtsü aser Tsüingrem dang iba tashidak nungi taneptsü agüjang ta sarasademtsü ajungshir, ta ashi.

Maneni doctor, nurse, security personnel aser iba tashidak wara tesashi den bendanga agütsür rarar ajunga atema maneni sarasademtsütsü ajungshir, ta ashi.

Asenoki mapang kabo iba tashidak madak takok angutsü teimla lir aser asenoki iba mera taket Tsungremmong benjong ya külemi janratema amungtsü yongya atar, ta BJP. Mokochung district ajangasa ashi.

Kiphire nung vaccine agütsüba sentong ayongzüka agi



Dimapur, Luroi/August 01 (TYO): Kiphire District Task Force (DTF) aser Assam Rifles 41 Battalion na longjemer July 31 nü Kiphire jila kübok Helipad nung vaccine agütsüba sentong ka ayongzüka agiogo.

Vaccine agütsüba sentong kübok Helipad nung nisung 35 nem vaccine agüja liasü. Maneni Sitimi PHC nung nisung 14,

Hutanger yimtsüing nung nisung 10, Tsuchu yimtsüing nung nisung 11 aser Pumur yimtsüing nung nisung 11 nem vaccine agüja liasü. Tanü vaccine agir 114 rongnung tetsür 39 aser tebur 75 liasü.

Vaccine agütsüba team ya District Program Officer, Kiphire Dr. Pewezo Khalo lenisüba nung inyaksangshio.

NSCN/GPRN (Reformation) ajanga Tsungremmong salem lemsatep

Dimapur, Luroi/August 01 (TYO): NSCN/GPRN (Reformation) ajanga Ao Naga nung ajak den Tsungremmong benjong salem lemsatep, koba August ita mezüing hopta nung amunger, ta sangdong ka ajanga ashi.

Tsungremmong ya alurutsü lia amungba benjong ka lir, aser iba benjong mapang pei tetsü-tebou mapang nungi agiba abensüoshi sentü balala agir benjongteper, tetsü-tebou kensü nung ken tena tsüingsanger aser

asaya balala asayar, ta NSCN/GPRN (Reformation) indang MIP (Ministry of Information & Publicity) sangdong ajanga ashi.

Tsüingrem temoatsü jazüka alurutsü anasa iba benjong ya amunger. Naga nung tejakleni oa aliba kin tem rongnung Ao Naga nung ya ka lir, shirnoki wadang aika nung tematiba jenjang nguteta len anir. Iba benjong ya ajanga Naga nung tsüingta telungjem aser yimjung lidakjang ta sarasademtsür, ta sangdong ajangasa ashi.

Tripura nungeri Mizoram yaritsü molunga lir: TIPRA chairman Pradyot



TIPRA chairman, Pradyot Bikra Manikya Debbarma

Aizawl, August 1, 2021 (Agencies): Honibarnü Tipraha Indigenous Progressive Regional Alliance (TIPRA) chairman, Pradyot Bikra Manikya Debbarma-i Tripura nungeri Mizoram nem teyari agütsütsü molunga lir ta metetdaksü.

TIPRA chairman-i Mizoram sports minister Robert Romawia Royte dang Tripura nübertemi yaritsü molungba osang lemsatepa liasü.

"Pu Robert Royte den jembiogo aser Mizoram-i osettsüset yoktsü maparen dak sendakba nung teyari aginüra onok yaritsü shiogo. Asenok aser Mizoram tsüingda arrotsü dak sendakba nung mangatettep alitsüa akok, saka tawa tanü timtemba mapang asenokia teyari agütsüba mapa inyaktetsü akok ta Tiplasa-i tanüingba Northeast state dang sayutsüla" Pradyot-i Twitter ajanga lemsatep.

Assam nungi osettsüset abenba garitem Mizoram-i maruba sülen Mizoram sorkari kidanger state ana- Tripura aser

Manipur nungi nüngdabatem bener arutsü asoshi lenmangtem bushitepogo.

Tripura den arrotsü aliba Mamit district (Mizoram) indang Deputy Commissioner, Lalrozama-i ashiba agi, Honibarnü kidanger State Tripura nungi totzü aser LPG densema nüngdaka osettsüsettem state-i bener arutsü tenzükogo.

Honibarnü Tripura nungi shishilembar telok tulu ka Mizoram-i aru aser state ana tsüingda garitem sadema senzütetsü atema Administration-i maparen achaayangdar, ta paisa shisem.

Honibarnü Tripura nungi totzü aser LPG abenba truck 20 shi Mizoram tongogo.

Kolasib district kübok Vairengte tesem anasa lendong (Arrtsü mechi Assam police aser Mizoram nung alirtem raratepba) atalokba sülen, July 26, 2021 anogo nungi tenzükoka Assam nungi gari ka danga state telungi mait, ta Honibarnü Kolasib Deputy Commissioner, H. Lalthangliana-i ashi.

July 26 nü Mizoram-Assam inter-state arrotsülen raratepba mapang Assam police 6 densema nisung 7 taküm sama.

Iba lendong ataloker sülen, Assam sorkari Assam nung alir nüber dang Mizoram-i maotsü asoshi tetuyuba agüja liasü.

Assam sorkar ajanga nübertem dang Mizoram-i maotsü osang agütsüba sülen tawa Mizoram sorkari nübertem dang marendaki Assam-i aotsü asoshi osang sangoktsü aser tim tekolakpurtem dang state nung tanga kintem kümzüka ayutsü asoshi tetuyuba agütsü.

Assam nung Silchar tsütsü National Highway-306 lenmang ajanga Mizoram ya tanüingba India tesem balala den sendaktepa lir. Iba lenmang ya Vairengte arrotsülen lir aser taoba Hombarnü iba tesem nung lendong tulu atalok.

Hokolbarnü, Mizoram sorkari Assam nungi osettsüset abenba garitem maruba dak sendakba nung ajemdaker Union Home Ministry dangi shidi ka yok aser iba tenokdangba agientsü asoshi Centre dang tebang aitsü mepishiogo.

Covid-19 dak sendakba osettsüset talisa test kits tem abenba garitem Assam kübok Lailapur-Dholai tsütsü NH-306 lenmang nung anendaka lir, ta Mizoram home secretary Lalbiaksangi-i züluba shidi nung shia lir.

Mizoram-isa, Assam kübok tesem asem nung Mizoram-i aruba railway lenmang raksatsür aliba yanglushitsü asoshi teyari meshiogo.

Ajisüaka, Assam Sorkari, State kübok NH-306 nung telok shingaia lenmang mesüra senzüsönongba nokdanga mali ta metetdaksü.

Assam nung taoba Congress MLA aser Manipur nung taoba Congress president BJP nung denogo

Guwahati/Imphal, August 1, 2021 (Agencies): Assam nung kümsük anaben tashi Congress MLA Sushanta Borgohain-i Deobarnü BJP nung denogo.

Guwahati nung aliba party state headquarters nung Borgohain-i BJP nung aden. Pai Hokolbarnü Congress indang primary membership nungi anena liasü.

"Assam chief minister Himanta Biswa Sarma aser taoba CM Sarbananda Sonowal nati ni BJP nung aniokba atema kanga pelar. Congress party nung züngsem akümdang ni künü anogo iba party toktsütsü ta tebilemba kecha maliasü" ta pai ashi.

Assam renloktsü aser nübertem tenzüktsü tangatetba nung BJP nung adener, ta Borgohain-i metetdaksü.

Assam kübok Thowra constituency nungi MLA Borgohain-isa Honibarnü state assembly nungi anenogo.

Külen, Manipur nunga taoba Congress president Govindas Konthoujam-i tanü BJP nung denogo.

Govindas Konthoujam-i tawa tu Manipur nung Congress nungi anena liasü aser

Deobarnü New Delhi nung BJP züngsem aküm.

Central BJP aser state lennirtem lia taoba Manipur Congress president-i BJP nung aden.

Iba sentong nung Manipur chief minister Biren Singh, Manipur BJP president Sharda Devi aser Manipur BJP in-charge Sambit Patra nungertem aden.

"Manipur nung Congress lennir tejen kari BJP nung adentsü bilemdar" ta Konthoujam-i tanü ashi.

"Northeast India nunger nisung pungu tashi Minister shimba atema nisungtem aoksar. Iba ya India putiotsü nung kodanga matalokdangba lir. Northeast nung temelenshi kanga aruogo" ta Manipur chief minister N Biren Singh-ia tanü ashi.

"Konthoujam Govindas ya Manipur nung dang masü saka Northeast nung ajaki metetba nisung ka lir aser pai tongtipang mapa aika inyakogo" ta BJP spokesperson Sambit Patra-ia ashi.

Modi-i linük nung aser talisa Northeast nung terenlok mapa inyakba ngua lennir tejen aikati BJP nung adener, ta Sambit Patra-isa metetdaksü.

Darrang Police-i sen taila menünger nisung ana apu



Deobarnü Darrang Police-i India sen taila menüingba maparen nung dena alir nisung ana apuba noksa nung angur.

Mangaldai, August 01, 2021 (Agencies): Deobarnü Darrang Police-i India sen taila menüingba maparen ka putet aser iba maparen nung dena alir nisung ana puogo. Police-isa India sen taila aika ngutetogo.

India sen taila note ngutetba aser nisung ana apuba osang tejangja agütsüba mapang, Darrang superintendent of police (SP) Sushanta Biswa Sarma-i, "Osang tejangja ka angazükba nung ajemdaker, anüingdang 12:30 ako meta Mangaldai police station nungi team kati India sen taila melenzüktsü asoshi merangdang" ta ashi.

"Bhebarghat tesem nungi police-i nisung ana apuba den külemi taila India sen talep ka ngutet. Iba police teloki ngutetba sen 500 talep nung sen taila 2,78,000 shi dena lir" ta Darrang district police-i metetdaksü.

Pua alir nisung ana ya Uttar Kalikhura yimtsüng nungi Rafique Ali aser No 1 Goriajhar yimtsüng nungi Jun Ali ta jangjaogo. Tenaprongla ya

Udalguri district nung Panery police station kübok alir.

Iba maparen dak sendakba nung, Mangaldai police station kübok pua alir ana anema ken o ka benokogo aser bushisüingdangtsü tenzükogo, ta Darrang Police-i ashi.

Taküm June tom nung, Darrang Police-i taila India sen menüingba putet aser iba maparen dak sendakba nung nisung pungo apu.

Iba mapang, Police-i taila India sen aser item note menüingtsü atema amshia alitsü akok ta temulung melemi bilema osettem ngutet.

Mangaldai police station kübok Bandiya Chapori aser Kharupetia police station nung Baroipara tesem mita aoba mapang sen taila yangluba maparen nung dena alirtem apu.

Kharupetia police-i pua alir ket nungi taila sen 500 talep ka nung sen 17,500 shi, shitakba India sen 13,410 den printer ka aser blank paper bundle ka ngutet.

GOVERNOR'S SECRETARIAT NAGALAND :: KOHIMA

No.G-06/4/AP/00(Vol-I)

Dated Kohima, the 29th July 2021

ADVERTISEMENT

Applications are invited to fill up 3(three) post of Bearers in the Pay Matrix level 2A(16300-51700) under Household Establishment of Raj Bhavan, Kohima.

The application should be addressed to Commissioner & Secretary to Governor, Governor's Secretariat, Nagaland, Kohima.

Terms:

1. Minimum qualification should be Class 12 passed with Diploma in catering and hotel management.
2. Work experience in star hotels in the capacity of restaurant waiters, room service and guest relations is desirable. Preference will also be given to applicants working in Government recognized hotels, institutions, Police Department, etc.
3. Age limit will be as per the Government of Nagaland norms.
4. The applicants are requested to clearly indicate their contact details such as email id, phone number and proper postal address in their applications. Copies of the relevant documents along with recent passport size photograph to be attached with application.
5. Appointment will be initially on probation for a period of one year or extendable.
6. The undersigned reserves the right to accept or reject any application without assigning any reason(s) whatsoever.
7. Please note that applications not fulfilling the above criteria will be summarily rejected.
8. Candidate canvassing in any manner will stand disqualified.

LAST DATE OF SUBMISSION : 31st August 2021 by hand/speed post/email : secy.rajbhavannagaland@gmail.com

(T. MHABEMO YANTHAN) IAS

Commissioner & Secretary to Governor.

Issued by DIPR



TIR YIMYIM

YIMOBILEM (EDITORIAL)

DIMAPUR TENTONÜ, LUROI(AUGUST) 02, 2021

Nashishisa tajungba !

India nung BJP teloki nashi melepdaktsüner, kechiyong BJP telok ya Hindu yimsü dak akang-asünga amangertemi anir akümba yimten telok ka lir aser Hindu yimsü amangertem asoshi nashi ya kanga temeshi shiruru ka lir. Iba jagiang India nung state aika nung nashi maleptsü aser nashi shi machitsü ozüng lateta lir aser tang tesüsa Assam nunga Hindu nung tekülem ki anasa nashi maleptsü aser nashi shi mamshitsü aser nashi shibelen masütsü atema ozüng lateta lir. Iba jagi Assam nung dang masü saka kidanger state-tem nung nashi shi mangutsüsa kümogo. Item state-tem nung nashi shi manguba agi nashishi achirtem timtemba dang nungibo nashi shi ayokertemang kanga agi takoksaba akoksadagi aser karbo nashi lepa ayokba mapa anen nungji, mapa maka kümogo. Iba ama mapang ka nung Meghalaya nung BJP kilonser Sanbor Shullai-i nübertem dang akshi, anshi aser nabong shi achitsü melena nashishiang achitsüla ta tayongzükba ka agütsüba jagi asenok Nagaland nung alir yimsüsür aser nashi aleper aser nashi shi achirtem ajak nem tangatetba tajung ka agütsüogo. Atangji, linük nung nashi shi machitsü aser nashi shibelen masütsü asoshi nokdangba telokji BJP telok lir saka kasa BJP telok nungi yimsüsür kati pei telok tangatetba anema yimjak nung ola adokba jagi Nagaland nung alirtema ayongzük. Northeast state ajak ya nashi shi kanga sapua achiba state-tem lir, anungji Assam ajanga nashi belentsü nokdangba ozüngji Northeast nung nashi shi ayoker aser nashishi achirtem anema inyakba mapa ka asütsü. Alima nung tamangba yimsü apia chiajemdi asünungbo Muslim aser Khristan-tem asoshibo akshi masü nashishiang achitsü tim aser temang asoshia akshi dangbo nashishi tajungba ta temetetertemi ashir. Anungji, kodang Muslim aser Khristan-tem alidak nashishi mayoktsü aser machitsü ozüng agütsüdir, ibajibo chiyongtsü nung dang masü saka tamangba yimsü nung kongshir asütsü. Joko, Assam nung, tenüng agibo, tesem ajak nung masü saka Hindu nung tekülem ki anasa nashishi mayoktsü ozüng latetba ajanga Assam ajanga nashi shibelentsü mekoki kümogo, iba jagi nashi shi achir longsua alidak Meghalaya, Nagaland, Mizoram aser Arunachal Pradesh nungbo nashi shi ya "black oset" ka amai kümdagi. Ajisüaka, Meghalaya minister-ba dak alaka, Nagaland nungbo kecha balaka nashi shi manguba atema ola adokba mangashir. Ashiko, asenok Naga nung rongnung nashishi yoka alirtem aikabo maliba agi takoksa ajurubaji shishia mebilemer asütsüa akok mesüra Naga nungertemi nashishi dangbo akshiang tesapuba achiba agi asütsüa akok. Ajisüaka, shiji yutsür kodang kin kidong aser tamangba yimsü aser sobaliba tapu aika aliba linük ka nung, nübertem rongnung ya achitsüla aser yabo machitsüla ta yimteni ozüng küma latetsüdir, ibajibo nübertem ajak alener tepuokdak ayuba den kasa asütsü. Meghalaya kilonseri ashiba ama, chiyongtsü achitsüabajibo senso shia pei mulung asütsüla. Aji oda, kari azü shi achir aser karibo per aser küpra dena achir, kechiyong parnok asoshi itemji chiyongtsü tajung , anungji, arem shiruru aser ozü sangnu kümzüka ayudak arem tawa nung mesüra, shingai nokdangtsü makok. Iba tangatetba nung Meghalaya kilonser amaji asenok Nagaland nung alirtemia nüchi o jembitsüla. Asenok ya India telongjem kübok alir saka India larbo masü, anungji asen lima nung asen chinüba chiyongtsü mayoktsü, machitsü aser mangutsüsa asenok alena meyudaktsütsüla. Aji oda, India telongjem nungsa liaka, tamangba yimsü nunga kecha metsükdaki pei amangnüsü amangtsü aser chiyongtsü chia ajemba nunga pei sobaliba melaba chiyongtsü chiajem taküm alitsüabajibo kecha telokia menokdangtsüla. Alima nung kari shi achir aser kari shi machir, aji pei mulung, anungji pei mulungba meshia achitsü atema chiyongdak hotel nung chiyongtsü tapu ajak angur. Aji oda, shi achir o machir na chipo aonpo balala nung soruchioker saka külemi mener chiyonger. Idakji kecha timtem mali. Alima topur ajungji yangji angur. Ibaji mangateti tang amai India nung yimten ao nungbo, tatsüka lirbo, India nung senso ajak atema temzüng nung dena chiyongtsü achitsüla aser machitsüla aser tamangba yimsü nunga iba yimsü yabo agizüktsüla saka iba yimsü yabo magizüktsüla ta enoka angutsü. Idangji, chiyongtsüa government-i mulungba chiyongtsü dang achitsü aser tamangba yimsüa government-i melaba ymsü dak dang amangtsü. Ibaji matalokdaktsütsü asoshi tangaribo ola adoker saka asenokbo itemji atalok yongyar amato ola madoker. Aji oda, center nungi yokba senotsü agidang asenokbo taküm alir asünungji, asen sobaliba aser tamangba yimsü dang nungibo center nung aliba government den tesendaktep yanglutsübjiang tongtibang amato bilemra, atangji, asenok alar lir, anungji Independent nungdaker.

OLEMSABANG

OJANG ANA MEYOKTEPBA AGI AKÜMBA OLONG

- T. Meren Paul, Kohima

Taoba idaadok nung zülujang 3 agi akümba ojang "Azü" indang tetetzü ratet züluba nungni meinoksemba ano Azü ojang ana-ji - (1) Azü: sü ataktsü asoshi angjeb mesaer anglong azüba, tola sweater mejitsü wool anglong azüba, winding thread (spindle). (2) Azü: tebu azüba, tangar nungi chiyongtsü agizüka machiba, not accepting food from others. Azü ojang sülenji ano ojang ka bendenlok nung o tetetzü palaka adokba temeyoktep ojang AROK OSEP (AO*) nung olong 32 boenoka lir, tatishitsü-azüla, azümesen etc. AO* nung menoki doktsüba yamala ojang aika lir aser ni bushitetba temeyoktep ojang 115, Clark Dictionary nungia karh densema, meteta alitsü aser mesamatsü atema yangi zülutsür. Mapang endoka yamala teti mejembiba olong bushia osang kaket nung zülutsü arendaker kechiyong karh-iboibai pei metetba shisangnerba ta teluer, saka lanuasensor yimtsüng nung malirtembo tangang Ao angazüer anungji parnok atema angazükdaktsütsü zülutsür, aji mesüra parnok kong nungi,shir dang angazüktsü?

1. Azü-a-arü - menden tera asepsi, tera mangaer aliba azüa aru, bend around, inward.
2. Azü-a-ao - indangindanga, metongmetonga aliba tera kiraka yokba, azüaao, bend outward.
3. Azü-ak - nisung mulungsentsü maden, shiruru yimypur dang ajar, beastly manner.
4. Azü-a-mazü - sübosolemtsü agi azüa asü masü?ta asüngdangba, does it suits?
5. Azü-a-mao - memelenshi, masetshi, akhi ama, unmoved,not bend.
6. Azü-a-mao - temetong, kerakkishi maket, indang indanger, not bend, straight.
7. Azü-a-maru - temulung temerang, tekong temerang, samaro, stubborn, resistant.
8. Azü-achi - kilem nung adongtsü asoshi azü linok/ninok agi rangzük, iba dangji azüachi ta ajar, cutting of thatch with sickle for roofing.
9. Azü-ao - tetsür ita shilem azü yimdokba, menses.
10. Azü-azü-er - tereprangtsü tesüteb, junga repranger, matching, suits.
11. Azü-bang - ayong azü tarok tekalen teladak tesem,shallow river bed above river pool.
12. Azü-bangmet - azü-i tangar dak anguba ajanga ken o menaba, litigation over dog bite.
13. Azü-bangmong - azüi chituba, meposhir doktsüba tebangmong tarak, mark of gnawing by dog.
14. Azü-ben - arem süngdong nung apongba kümba tapu ka, tanük aser tepungba, wild cotton.
15. Azü-bong - Azü dak poktetba atsük, joka joka, bunga bunga aoer, dog flea.
16. Azü-chanu - azü mepuzük techanu, ano tain maküm, puppy.
17. Azü-chiemdak - azüi kima yimdong nung chia nemzüba, dog scavenging around.
18. Azü-er - sü ataktsü asoshi angjeb mesaer ang telong küma azüba, tola sweater mejitsü wool anglong azüba, winding of yarn, spindle.
19. Azü-er - tenük azüer, temulung azüer, causing burning sensation, affecting.
20. Azü-et - teka anaprongla agi akangakanga soitba, hug, hold.
21. Azü-jemdang-yiruyuponga azü ayimba anendaktsüba, stopped bleeding.
22. Azü-jemjem - kilem tatembang tzü yimzüka aludak, edge of the roof where waters drips.
23. Azü-jendok - tetsüng tepen nung azü tamajung atsüngdenba teküp tupoker yimdoka endokba dang azü jendok ta ajar, aspiration of bad blood.
24. Azü-jenlok - tola süoshi mesüra temang nung azü raklokba, blood stain
25. Azü-junglang - ajungbena denjia, ajurushia chiyongshiba, agishiba, unintended charity.
26. Azük-angüm - süngdong nungi süngsang lepdoka endokba, angümdokba, pollarding
27. Azük-aro -inyakba ajak nung tajangzük anguba temoatsü, blessings.
28. Azük-atu - süngdong süngsang azüklen aliba lendokba dang azükatu ta ajar, pollarding.
29. Azük-azük - tekong nung azük pungokba, azükazükba, wearing necklace.
30. Azük-banglak - azük talangkadi atuba tatembanglak, tip of the pinnacle.
31. Azük-e - temaleni, azüklen nungi, upward
32. Azü-ket -mongjen melenshia temaleni ayur atuba, bending upward.
33. Azü-ki - kilem nung azü tongasüngkum amshia yangluba ki, rude thatched house.
34. Azü-ki - azü ayutsü ki palaka yangluba, kennel.
35. Azü-kidong - teku telung nung temesen, temulungjang aser tepokpok aliba ya tar tepen den memeyoktepi takdang kati pilaa lir aser takdangbaji kodang rakpokdir azü aika alur, iba takdang dangji azükidong ta ajar, heart, lever and lungs cavity inside the chest.
36. Azü-kumo - azü dak adokba kumo, temang takep ajak zükpanga adoker, scabies.
37. Azük-ki - atem ali nungi ajungketa asüba ki, elevated floorhouse.
38. Azü-kilem - tzünglu aser anü nokdangtsü azü agi kilem atongba, thatch roofing.
39. Azük-lak - azük temaleni talangka ajungketa tua aliba, pinnacle.
40. Azük-len - nisung tepen tekolak temalen songtokba ser tekalenji azüklen ta ajar, place above the arm stretch overhead.
41. Azük-lok -azük ka azüka aliba nung ano talila azük azükba dang azüklok ta ajar, putting on more necklaces in addition to the one already wearing.
42. Azük-mazük - azüküytsü asü mazüküytsü ta jembiba, uncertain of being blessed.
43. Azük-mazük - nisung dak azük asü mazük ta asüngdangba, enquiring if lashed.
44. Azü-ko -azü (sesame) roer semki nung donger mapokchi nung meyoktepba asetba chiyongtsü tapu ka yangluba dang azüko ta ajar, mokokrangdang ta kah ajar, roasted and pounded sesame mixed in sticky rice.
45. Azük-pang -teku sünga azük aika azükba, azük agi azükbang, loaded with bead ornaments.
46. Azük-sapang - nisung ayeptsü azük nung sapang atemba, elevated platform
47. Azük-rep - au, süngkum tepolong aliba tematsük küma zükrepba, flatten.
48. Azük-yu - thia ajem, aiben sütep süteppa indanga ajuruteper, favorable, divine inclination.
49. Azü-koren - azü tebung mi talak tawak, swollen genital of a dog.
50. Azük-tom-ali nungi temaleni ajungketa atuba talak matong, tom nung, half way to pinnacle.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

International Religious Freedom Ambassador Rashad Hussain shim



US Tir, Joe Biden aser Rashad Hussain (abelen) na noksa nung angur.

Washington, D.C, August 01 (Agencies): US Tir, Joe Biden-i international religious freedom (IRF) nung tongti menden pezü atema ketdangsertem shimogo; menden pezüji International Religious Freedom (IRF) atema Ambassador at Large ka, Monitor & Combat Anti-Semitism atema ketdangser ka aser United States Commission on International Religious Freedom (USCIRF) Commissioner ana lir, ta Amongnü International Christian Concern (ICC) osang ajanga metetdaksü.

IRF Ambassador atema Biden-i Rashad Hussain shim. Pa ya tang National Security Council kübok Partnerships & Global Engagement nung Director teinyakdak. Taoba mapang US Tir, Obama administration mapang nunga alima nung Yihuda nung anema inyakba anema Hussain leniba nung inyakba den külemi Muslim linüktem nung minorities kümzüksü atema pa leniba nung inyaka aruogo.

USCIRF Commissioners

shima aliba, Khizr Khan aser Rabbi Sharon Kleinbaum naprongla ya meimchir temeden atema inyaka arurtem lir. Khan ya 1980 küm United States-i aoba sülen pai Constitution Literacy & National Unity Project tenzuka liasü. Pa ya Harvard Law School nungi graduate lir aser Supreme Court nung law practice asütsü temeden lir.

Ano külen Rabbi Sharon Kleinbaum ya New York nung aliba Congregation Beit Simchat Torah nung lenir. La ya New York City's Commission on Human Rights nung Commissioner inyaker.

Ano Biden-i Anti-Semitism anema inyaksü asoshi Special Envoy, Deborah Lipstadt shim. Lai-a mapang talangka minorities reshikangshi anema inyaka aruogo aser laisa Emory University nung Institute for Jewish Studies tenzuka liasü.

IRF nung ketdangsertem shimba dak sendakba nung ICC nung Advocacy Director, Matias Pertulla-i, "Biden Administration nungi

International Religious Freedom atema Ambassador-at-Large shimba asoshi ICC-i pelar. Iba maparen junga tenzüksü aser alima nung religious freedom atema Rashad Hussain den longjemer inyaksü onoki yongyaa atar," ta metetdaksü.

Taoba ita Washington D.C nung tang mezüng International Religious Freedom Summit agia liasü aser anogo asemnü senden nung tamangba yimsü balala nungi lenirtemi alima tesem ajaklen tamangba yimsü sadoka amangtsü temeden atema jembio.

IRF senden nung tongti o jembirtem rongnung House Speaker Nancy Pelosi, D-Calif., taoba mapang US Secretary of State, Mike Pompeo, Tibet nung lenir Dalai Lama, USAID Administrator Samantha Power, White House Faith-Based & Neighborhood Partnerships Executive Director, Melissa Rogers aser USAID faith-based office director, Adam Phillips nung densema liasü.

Laos sorkari Khristantem kümzüksü atema Arogo den inyaker

August 01, 2021: Buddhist yimsü aser süng-long külemer nütsüng aika aliba, Laos nung Khristan yimsü sadoka amangtsü atema temeden agüja lir, ajisüaka yimsüngtem nungbo Khristantemi aiben reshikangshi ajurur, ibayongji Laos nung tamangba yimsü dak sendakba mapatem kümzüksü aser religious freedom ajungkettsütsü atema 2019 küm ozüng ka yanglushia liasü, ajisüaka communist linük nung, talisa yimsüngtem nung tang tashi Khristantemi reshikangshi aser amokmeren ajurur.

Ajisüaka yimsüngtem nung Khristantem kümzüksü atema Laos sorkari Khristan telok balala den longjemer inyakdar, ta osang ka ajanga metetdaksü.

Laos nung religious freedom ajungkettsütsü aser kümzüksü atema ozüng lir, ajisüaka iba linük nung

Khristantemi mapang shia reshikangshi ajurudar.

Khristantem temeden atema tangbo Arogo züngsemtemi Interior Ministry aser Lao Front for National Construction den longjemer inyaker. Parnoki ketdangsertem dang Law for Evangelical Church ozüng metetdaksür.

2019 küm December ita nung agizükba ozüng ya ajanga tekülem sentong agitsü aser sayutsüngitsü atema Khristantem nem temelaba agütsür.

Laos nung yimti aser jilatem nungbo Khristantemi sadok-sadoka tekülem sentong agiteter saka yimsüngtem nungi Khristantemi amokmeren aser reshikangshi kanga ajurur.

Sorkari sponsor asüba shisaliok committee ka nung züngsem aser Arogo lenir kati, "Yimsüsürtem aser yimdaclirtemi yimsüngtem

nung aliba Khristantemi nisung tamajungertem ama züngshir. Khristan aika anema inyakogo, yimdak nungi aridokogo, aika samaogo, puogo mesüra tepuokdak yuogo; iba ya talisa yimsüngtem nung ketdangsertemi Khristantem libaliro mangatetba agi lir," ta ashi.

"Tangbo mapang shia seminar agidar, anungji ketdangsertem aser Khristantem na tsüngda tangatetba alitsü ta amanger," ta paisa ashi.

Ajioda yimsüngtem nung ketdangsertem nem Khristan yimsü indang angatetdaksütsü atema mapang shia seminar ayongzüka agia arudar.

Buddhist linük nung nütsüng million 7 lir aser iba nungjagi nütsüng shilem ana dang Khristantem lir; Khristantemi tesadang kabo Catholic Khristantem lir.

ANO GO ABEN TSÜNGREM DEN

Walokwatem mesüra tesendaktep ?

Aser shinga mesenzüba lima aser nisung shinga malidak, Ijip nungi onok anitetba Kibubaji kong lir ta parnoki tashia mashi. Yeremia 2:6.

Khristan yimsü Yisu Khrista den kanga anasatepa aliba aser Pa den tesendaktep nung ainba lir. Iba yimya süpaa amshitsüba tamang tesayuba ka masü mesüra temenen paitokba masü. Tsüngremi tenyaba mapa ajakji Pa temeim Pa nüburtem den lidaktsütsü atema lir.

Tsüngremi tekülemji asenoki Pa sentsüwangshi ngudaktsütsü aser Pa den apet asenok nungi telangzüba angutsü asoshi tentet, kechiaser aikati ibai yimya süpaba mapa ka, tekülem sentep nung ken atentsüba yimsü ka dang kümduksü. Tekülem sentepi aobaji Tsüngrem sentsüwangshia pa den ajuruteptsü nükjitung nung masü saka tekülem sentep nung metenra tangari tamanger masü ta ashitsü tsübuba agi aor aser atener. Tsüngremi tenla agütsüba yimyaji asenoki Pa nüburi, asenoki Pa dang meimba ajunga sayudaktsütsü asoshi tentet; saka aiben asenoki Pa mesüzükba aser asenok aibelenba Pa ain adokba ajema kümduksütsü tangatetba nung inyaker. Asenoki Tsüngrem den sensaksemteptsü asoshi Pai asenok dang sarasademtsü sayu, saka aiben asenoki ibai sarasadem ajanga raksar "sarasademer" aser asen Tebu mulungjang nung kechi bilema lir aji mangai aritepa toktsür aor. Tsüngremi shirnok meimer parnok kümzüksü asoshi ozüngji tenteta ayu, saka ibai Tebu den tesendaktep yangluba lemanng masü ozünyim lemanng kaang kümduksü. Tamajung nungi kümzükdak lemanng masü saka temerenshi agütsüba lemanng ka kümduksü.

Tsüngrem den telungjem nungi pilar tamangba yimsü mapatemji tazüngla walokwatemba lir. Yeremia mapang nung nüburtemi Tsüngrem meteni walokwatemba nung temulung süa liasü. Parnok yimsü nung parnoki temulung lema liasü aser parnok den Tsüngrem matenba parnoki memetetti liasü. Tsüngrem meteni sarasademtsü, tekülem nung atentsü mesüra tenla agütsütsü takoktsü asü? Atangji ibai takoktsü! Khristan aika asoshi ibaji tesasatsü mapa lir. Yisu Khrista den tesendaktep makai yimsü nisung ka tesü. Kodang Tsüngrem dena lidir tepilaji tejangja asütsü.

Egypt nung Coptic Orthodox Khristantemi timtemkanga ajangshir

August 01, 2021: Coptic Solidarity indang 'Jihad of the Womb': Trafficking of Coptic Women & Girls in Egypt' ta ser report ka ajanga Egypt nung meimchir temeden kümzükka ayutsü atema ketdangsertem teinyaktsü mapatem indang shia lir, talisa iba report ji linük nung Khristantem anema inyakba tatalokbatem den medemdanga shia lir.

Egypt nung Khristan nütsüng timbaka Coptic Orthodox Khristantem lir.

Coptic Solidarity report ajangasa, Egypt nung Khristan tetsürtem puer aoba kanga bulua ataloker, ta metetdaksü.

Islam yimsü alia amangertemi Khristan tsür aser tetsür chanutem puer aor, mesüra Muslim nung den kibong kümduksür. Khristan tetsürtemji pei kibongtem nungi piladaksür aser kangshia Islam yimsü dangi meyipdaksüba sülen Muslim nung den kibong kümduksür, ajisüaka aiben police-i item ama ken o bushisüngdang masür mesüra aibelenertem anema meinyakteter, ta kasa report ajanga metetdaksü.

Ano külen Egypt linük nungsa yimtenren, rongsenkettsüng aser meimchir temeden onüktem nung tim

mesü inyakba asadangtsü atema US House Foreign Affairs Committee senden ka nung

meimchir temeden atema inyaker advocates aser shisashirtemi Egypt nung tamangba yimsü dak sendakba temeden magütsüba indang lemsatepa liasü.

Mezüngbuba panel nungji Cairo Institute for Human Rights Studies Director, Bahey Eldin Hassan aser Freedom Initiative Tir, Mohammed Soltan na densema liasü. Tenaprong Egypt nung lir aser tenapronglai Egypt sorkar inyakyim aitsü.

Hassan-i, Egypt nung meimchir temeden atema nokdaker aser sorkar inyakyim anema jembir aika tepuokdak ayur ta metetdaksü. Soltan-ia Egypt nung sorkari tim mesüi inyakba mapatem indang metetdakja liasü.

Tanabuba panel nung jembirtemi Egypt nütsüng lenla nungi sorkar inyakyim indang metetdakja liasü. Panel nung züngsem pezüpronglai Egypt Tir, Abdel Fattah al-Sisi-i meimchir temeden anema inyakba atema aitsüba den külemi US-Egypt tesendaktep atema US teinyaktsü shilem indang tebilemba onüktem lemsatepa liasü.

OLONG PAITEP # 5893

	1				2			3		4
5								6		
7			8							
								9		
		10								
11										12
					13					
					14					
15										
					16					

- | | | | |
|-----------------------|-------|-----------------------------|-------|
| TIPILEN | | LANGTSÜNGLEN | |
| 1. Balaka | - (5) | 2. Hai sür inyak | - (4) |
| 6. Aika shirangba | - (4) | 3. Aor tenüing ka | - (6) |
| 7. Tar tatsü | - (6) | 4. Ali telungi talangka lur | - (5) |
| 9. Nenü'er jabaso | - (4) | 5. Tebang kenyongi mazüoker | - (4) |
| 10. Sen latettsüba | - (7) | 8. Ken atema anenzükertem | - (5) |
| 11. Tangar kübok alir | - (4) | 9. Toktepa noktak | - (5) |
| 14. Lon nung inokba | - (6) | 10. Sen | - (6) |
| 15. Tzü ayimdak | - (4) | 11. Benjong agi | - (5) |
| 16. Ajok | - (5) | 12. Telung nung rizünga ayu | - (4) |
| | | 13. Tebang nung enok | - (4) |

OLONG PAITEP # 5892 TELANGZÜBA

- | | | | |
|---------------------------------|--|-----------------------------------|--|
| TIPILEN : | | LANGTSÜNGLEN : | |
| 1. Lemsä, 3. Osang, 5. Mezüing, | | 1. Lamem, 2. Sangken, 3. Omen, | |
| 6. Agi, 7. Sura, 8. Tebutem, | | 4. Asüküm, 7. Sendong, 8. Tejang, | |
| 9. Amen, 12. Odi, 13. Asayar, | | 10. Tanga, 11. Tazü. | |
| 14. Angsü, 15. Agima. | | | |



2021 JULY ITA LILI RESULT !

July ita nung Lili tajungtiba (First) shimteta tanü yangi lephsia agütsür. Lili zülur-i August 10, 2021 tashi nung Tir Yimyim Office nungi senpet agizütsü mepishia metetdaksür.

KARBO MANGYIMER, KARBO PELATEPER, KARBO TAJANGZÜK ANGUR

Sobangba : Ohoi...Kapu jungasa lidar sudi...??? Koa na tanüpbö akhi memesuk tejak kanga mesangwa ado...??? Kibong nung tebilemtsü khuret kar ali asü koda...!!!???

Alokba : Junga lir-ko...Oda tang alima tensa mopong ya shisadanga amenerba dang ako... Kar mangyimer...Kar pelar...Karbo tajangzük angur...ta asüba ya koda...!!!???

Sobangba : Waaaammmaaaa...!!! Kapu nai ashibaji nibo kecha mangateter ado...!!!!!!???????

Alokba : Ena...Corona wara agi asür kibongtembo kanga sasaset mang-ayimer...Süngden (coffin) aser naro ayokba dokan kibur-bo tajangzük angur...Osettsüset/chiyungtsü ayokertema jenjang tali tur ayokerji pelar...Ashiko ano iba COVID-19 mapa nung tongti ketdangsur karbo sen lakh aika ajangzuka ali-ja shibai metet...??? Alima nung wara tamajung kar arura Doctor-tem tajangzük angur...Rongrongshishi/mangatetep kar adokra Lawyer-tem tajangzük angur...Lendong-tsüdong teraksa kar atalokra Engineer/Dekadar-tem tajangzük angur...Ajisuaka wara agi atongertem/tasürtem ajangzükdakbo kecha nunga maka.... Anungji pei sasa kümdanga alitsüba danga.

- Lilir : L.Kika Pongener.

AO OSHI ANGAZÜKDAK:
TANÜ ANGAZÜKTSÜBA OJANG

Kirem
(n) tsükchir tekolak ret , mangko (skull)
* Nokinketertemi bener aruba tekolak **kirem** küma ayu.

Kirem
(n) takari mapa inyakdaksütsü atema alizüka ayuba nisung, alar (slave)
* Kidang **kirem** ayuba sobaliba ya tim masü.

NAI-A YA METETTER MA?

London nung nisung kati car boot sale ka nungi kirakadoker aliba spoon tejen ka alizük. Pai iba spoon ya senti oset ka asütsü akok ta bilema 'paise 90' yong alia liasü, ta The Sun sangdong ajanga metetdaksü. Tatsüka lir, nisungba yagi Crewkerne, Somerset indang Lawrences Auctioneers dang iba spoon sayu aser auction atema agütsü. Osang ataba mapang, Lawrences Auctioneers indang silver expert Alex Butcher-i iba spoon bushisügang aser spoon tejen ka ya 13century nung yangluba silver spoon ka liasü ta ngutet. Online auction atema iba spoon agütsüba sülen, sen 197,000 yong iba spoon yoktetta liasü aser tax densema iba spoon jenjang sen lakh 2 dak tema tuogo.

TANÜBO NAI LANGZÜANG

Q. Rudreswara temple kodang yanglua liasü?
A.1213 AD B.1213 BC C.1200 AD D.1200 BC

—————(Taruba adok nung onoki langzüsü)

YASHI ADOK TELANGZÜBA : April 2021

SUDOKU # 5933 TELANGZUBA # 5932

					9	8		1	4	8	3	5	7	6	2	9
	4		2	7	5			3	9	6	8	4	2	5	1	7
	7	9	1	6	3			2	7	5	1	9	6	3	4	8
6			9	8				9	6	1	7	8	4	2	5	3
	9	1	6	2			4	5	8	2	6	3	9	4	7	1
	2			7	1			4	3	7	5	2	1	9	8	6
9	1		4	3	5	2		6	5	4	9	1	8	7	3	2
3						1	7	7	1	3	2	6	5	8	9	4
2			7					8	2	9	4	7	3	1	6	5

OJANG LUTEP # 5478

- EIP :
- SASA :
- CBAHU :
- NDMEEN :
- NGNU :
- NRMEA :
- PAMANG :
- LANGTAKA :
- ETATATA :
- LIMAR :

OJANG LUTEP TELANGZÜBA # 5477

TENÜKMEREM AGI SÜNGER ALIBA YIMTI NUNG TANISHIR TAJUNG KODANGA MADOKTSÜ

TAN HOPTA ATEMA - KOMA SÜLA ?

Q. Mizoram aser Assam arrtsülen atalokba ama Nagaland aser Assam Police na ta arrtsü raktepa khatem nunga koma süla?



August 01, 2021 nü Lahaul & Spiti district nung tribal nisung aika samaba sülen bushiba mapang tangokba noksa nung angur. Himachal Pradesh kübok Lahaul-Spiti nung tzunglu sashia aruba sülen tesem aika nung anentsüh lendong atalokogo.

Ladakh-i Centre dang State jenjang den Arlla 371 akhanger

New Delhi, August 01 (Agencies): Jammu & Kashmir nung Arlla 370 agienba sülen küm ana ajungtsü anogo pezü dang lia tang mezüing Amongnü Kargil aser Leh nungi lenirtem senden mena Ladakh nem state jenjang agüjang, ta takhangba agütsüogo.

Parnokisa Arlla 371 nung aliba tekümsükba agüjang aser Jammu & Kashmir nung ama Ladakh nungbo domicile ozüing kecha magizüksü, ta metetdaksü. Lenirtemisa Ladakh nem Lok Sabha menden ana agüjang, ta takhangba agütsü.

Senden tembangba sülen osangbenertem den jembidang Apex Committee of Peoples Movement of Ladakh Chairperson, Thupstan Chhewang aser Kargil Democratic Alliance Co-Chairman, Asgar Ali Karbali nati, onoki Ladakh atema state jenjang akhanger, aser Ladakh

region nungbo Jammu & Kashmir nung benokba domicilie ozüing kecha magizüksü, ta metetdaksü.

Parnokisa region nem mapa 12,000 shi agütsüsüla, aser item takhangba magizükra parnoki kaketshirtem unions den longjemer inyaksü, ta metetdaksü.

Karbali-i, "State jenjang den külemi Arlla 371 kübok tekümsükba agütsüsüla mesüra linük temzüing kübok sixth schedule agütsüsüla," ta metetdaksü.

"Region nem parliamentary menden ana lemsüksüsüla. Item onük aser takhangbatem atema onoki Union sorkar den jembitsü," ta paisa metetdaksü.

Iba senden nung adener ka aser Ladakh region nungi lenir, Sajjad Hussain Kargili-i, tang mezüing Ladakh puti otsü nung region anaprongla nungi lenirtem longjemer senden mena obang ka ser telemtetba agiogo,

ta metetdaksü.

"Union Territory (UT) ajanga onok tebilemtsü onüktem mebantetsü, ta nüburtemi angatetogo. UT ajanga nüburtem taginüba matalok. Tesüiba küm ana tsüingda onok kecha makai kümogo. Lanurtem mapa nung meshimoker. Ketdangsertemi yimsüsüba ajanga Ladakh nung alirtem tebilemtsü onük mebantetsü," ta paisa metetdaksü.

Arlla 370 agienba sülen yimtenren parry balala aser yimsü organizations balala nungi Apex Committee of Peoples Movement tenteta liasü, iba sülen parnoki Union Home Minister ajurua senden menogo.

June 24, 2021 nü New Delhi nung Jammu & Kashmir nungi party balala nungi lenirtemi Ato kilonser, Narendra Modi den senden ka amen aser July 1 nüa Home Ministry-i Kargil Democratic Alliance (KDA) den senden menogo.

2017 nungi 2019 küm tsüingda tanur 24,000 soseta süogo: NCRB

New Delhi, August 01 (Agencies): India nung 2017 nungi 2019 küm tashi nung arrshi küm 14-18 tsüingdapur tanur 24,000 dak tema soseta süogo, ta Amongnü sorkar data ajanga metetdaksü.

National Crime Records Bureau (NCRB)-i linük nung tanurtem soseta asüba osang bendena liasü, aser iba osangji Parliament nung metetdaksü.

NCRB data ajanga ashiba agi, 2017-19 küm tsüingda arrshi küm 14-18 tainlonglong tanur 24,568 soseta süogo aser iba nungjagi tanur 13,325 bo tetsürtem liasü.

tebur meimtepba kuli ajanga asü aser shirangba kuli ajanga pei sasa asür tanur 2,567 liasü. Tashiyim amshia azükba kuli ajanga tanur 81-i soseta asü.

Tanurtem soseta asüba kulitem rongnungsa- kinünger asüba ajanga, temesepba mozü aser yi ajemba, tanur benlokba, lokti nung maaksü achiba, mapa manguba aser sensak tia ajanga soseta asüba densema lir.

Tang coronavirus wara ajanga tensa tamajungba akümba nung ajemdaker tanurtem temeden atema inyakerteri school curriculum nung life skill training inoksemtsü aser healthcare tsütsü mental health nung temelung agütsüsüta metetdaksü.

2017 küm tanur 8,029 soseta asü, 2018 küm tanur 8,162 aser 2019 küm tanur 8,377 soseta asü, ta kasa osang ajanga metetdaksü.

Tanur timba soseta asüba state ji Madhya Pradesh (tanur 3,115) liasü, iba sülen West Bengal (2,802), Maharashtra (2,527) aser Tamil Nadu (2,035) state tem lir.

Tanur junga masadangba kuli ajanga tanur 4,046 soseta asü, kiyimba dak sendakba kuli balala ajanga tanur 639 asü, aser iba nungjagi tanur 411 bo tetsürtem liasü.

Ano tanur 3,315 bo tetsür-

CRY-Child Rights & You nung CEO, Puja Marwaha-i, soseta asür tainlonglong pur tanurtem timbaka mental health tsütsü timtem ajangshirtem mesüra kanga jashirtem lir, anungji anema alibaren tsütsü tainlonglongpur mental health ya kanga tongtibang kümogo, ta metetdaksü.

Tanurtem mental health junga alitsü atema sorkar, lokti tentettem aser kibongtemi longjemer inyaksüla, ta laisa metetdaksü.



August 01, 2021 nü Lucknow anasa State Forensic Science Institute amenoktsü atema foundation lung azüingtsüba sentong nung Union Home Minister Amit Shah, Uttar Pradesh Chief Minister Yogi Adityanath aser Deputy CM K P Maurya nung adenba noksa nung angur.

Maharashtra nung tang mezüing tetsür ka dak Zika virus putet

New Delhi, August 01 (Agencies): Maharashtra state nung tang mezüing arrshi küm 50 tetsür ka dak Zika virus putetogo, ta ketdangsertemi metetdaksü. State sorkar ketdangsertemi nüburtem dang maoksatsüla kechiyong la anepdar aser lar kinünger shinga dak-a iba tashidak temaitsü mali, ta metetdaksü.

Tetsürlaji Pune district nungi lir aser la Belsar yimdam alir.

State sorkar ketdangertemisa, tetsürla dak

iba tashidak aliba osangji Hokolbarnü jangja. La dak Zika virus dang masü saka Chickungunya tashidak-a putet. Honibarnü state health department nungi team kati iba yim semdanga sarpanch aser gram panchayat züingsemtem ajurua iba tashidak nokdangtsü atema tetuyuba kar agüja liasü.

Aedes aegypti merlai iba virus ya proker aser iba tashidak agi shirangertem aika dak tashidak temaitsü madoker. Ajisüaka iba tashidak keta aliba

temaitsütem rongnung temang metaba, temang mesüra teret teloktep ashiba densema lir; talisa mashisa alirtem kanga kümdangtsüla, ta ketdangsertemi metetdaksü.

State surveillance officer, Dr Pradip Awate-i, "Zika virus keta alir shilem 80 dak temaitsü mereprangteter aser tanüingba shilem 20 dak yimra atongba temaitsütem alir. Tzü peria ajemba, anisüingzükba aser paracetamol mozü achiba agi iba tashidak aneper," ta metetdaksü.

India nung ano nisung 41,831 dak Covid putet

New Delhi, August 01 (Agencies): Tesüiba anogo ka tsüingda India nung ano nisung 41,831 dak coronavirus putetogo aser tang tashi nungbo nisung ajak senteper 3,16,55,824 dak iba tashidak putetogo, ta Amongnü Union Health Ministry-i metetdaksü.

Tesüiba ghonda 24 nungsa linük nung coronavirus agi shiranger 541 süogo aser tang tashi nung iba tashidak agi asür ajak senteperbo 424,351 jungogo, ta Health Ministry-isa metetdaksü.

Tang linük nung coronavirus agi teshirangdakpur (timba) 4,10,952 kümogo aser ibaji coronavirus caseload nungi shilem 1.30 lir.

Amongnü samples 17,89,472 tendang aser tang tashi nungbo samples ajak senteper 46,82,16,510 tendangogo, ta ICMR-i metetdaksü.

Tang anogo shia

coronavirus positive putetba shilem 2.34 aser hopta shia positive putetba shilem 2.42 kümogo, ta health ministry-isa metetdaksü.

Linük nung coronavirus agi shiranger 3,08,20,521 anepogo aser iba tashidak agi shiranger asüba shilemji 1.34 lir. Tang tashi nung vaccine dose crore 47.02 agütsüogo.

Tesüiba ghonda 24 tsüingda coronavirus agi asürtem 541 nungji Maharashtra nung nisung 225 asüba, Kerala nung 80 aser Odisha nung nisung 68 asüba densema lir.

Linük nung iba tashidak agi shiranger timba asüba state asemji Maharashtra (1,32,791), Karnataka (36,562) aser Tamil Nadu (34,076) state tem lir. Delhi nunga iba tashidak agi shiranger 25,053 süogo, Uttar Pradesh nung 22,756, West Bengal nung 18,136 aser Punjab nunga nisung 16,293 süogo.



August 01, 2021 nü tzunglu kanga aruba sülen Ranchi anasa Sonahatu area nung Tamar Police Station area aser Bundu police station area na sendaktepba apu chirepa aliba noksa nung angur.

Afghanistan tzumetsung nung asur nisung 100 alemogo



Afghanistan yimtiba, Kabul anudoklen Nuristan province nung tzumetsung tesashi adoka anentsuh aluba sülen nisungtemi iba lendong ajurua alirtem bushiba noksa nung angur. Afghanistan nung tenem agi sünga aliba northeastern Nuristan province nung ajungben tzumetsung adoka nisung noklang dak tema süogo, koba Taliban teloki yimsu asur.

Kabul, Luroi/August 01 (Agencies): Afghanistan anudoklen Nuristan province nung tan hopta tzumetsung adokba lendong nung asur nisung 113 jangjaogo aser ano aika samar bushir, ta ketdangsürtemi ashi.

Linük yimtiba, Kabul nungi northeast tsütsü kilometer 200 shi pilar Taliban-i amokbanga aliba province kübok Kamdesh district nung Bodhbarnü tzunglu kanga sashia aruba sülen timtem ajurua alirtem kumzükba maparen Deobarnüa inyaka liasü.

Afghanistan's National Disaster Management Authority (ANDMA) indang odongtar Abdul Samai Zarbi-i osangbener dang ashiba agi, tzumetsung yagi nisung aliba ki 170 dak tema tera mesüra kanga mejungi raksaja kibong 300 shi dak kongshi.

Iba lendong nung yiruba nisung 34 lir, saka timba alitsü akok, ta Zarbi-i ashi.

Tzumetsung yagi tongtipang apu ka raksatsü, anungji timtem ajurua alirtem nem chiyongtsü, khen asoshi jenokdak tesem mesüra mozü amala tongtipang teyari magütsüteter, ta ketdangsürtemi ashir.

"Tia maka iba tesem ya

Taliban kübok lir astünung, onoki provincial team tem meyocteter," ta Afghanistan indang state ministry for disaster management atema odongtar Tamim Azimi-i osangbener dang ashi.

Ajisüaka Afghan Red Crescent Society nungi survey team temi iba tesem ya semdanga teraksa ajurua aliba aser teyari nungdakba asadanga liasü.

United Nations-ia tajemtsü tzü temürek dena iba district nem teyari agütsütsü meranger, ta osangbener kati Kabul nungi ashi.

May ita tetenzüklen US-i aniba bendanger sepaitem anungzuka alirtem Afghanistan nungi ainshi tenzükba mapang Taliban teloki yimdakyimtsungtem aser arrtsü alema senzuba tesem tongtipang kar raksükogogo.

Parnoki iba amala tesemtem tali amokbanga aoba mapang Taliban asoshi Nuristan tensa ya tetendangba ka amai lir, kechiaser parnoki maneni yimsü asünungbo iba amala tensa nung parnoki nüburtem koba tashi yaritsü, ta nüburtem repranga atar.

Afghanistan nung mapangshia iba ama tzumetsung

yagi kongshia nisung aliba ki, alu aser ki-o-jen balala raksatsür.

2020 küm August ita province 13 nung ajungben tzumetsung adoka nisung 150 dak tema asü.

Küm aika raraba den tzi-mopung melenshia aoba aser alimar lendong balala ajemdaksütsü maparen nung senotsü peria mindokba ajanga Afghanistan nung iba ama alimar lendong tali ataloker, ta UN ajanga ashir.

Afghanistan nung küm shia iba ama alimar lendong balala agi nisung 200,000 dak kongshia timtem ajurur.

CAR northeast tsütsü sorkar anemertemi azüdokshir

Bangui, Luroi/August 01 (Agencies): Central African Republic (CAR) nung aliba United Nations peacekeeping mission ajanga ashiba agi, linük northeast tsütsü sorkar anemertemi amakba lendong nung civilian trok süogo.

"Tanep mesangwajungi 3R (Return, Reclamation, Rehabilitation) nungi züngsem kari Mann yimtsung nung Central African mitkar amenoka alidak kanga sashia amak tenzük," ta UN odongtari ashi. Iba linük nung UN indang MINUSCA mission atema sepai 12,000 yoka lir.

Iba lendong nung civilian kar yirua liasü, ta odongtar-isa ashi.

Linük yimtiba, Bangui nungi kilometer 550 shi pilar aliba Mann yimtsung nung tangbo tensa aziükogogo aser sepaitem yimtung nung senzür, ta Lieutenant Colonel Abdoulaziz Fall-i ashi.

CAR nung telungpur telok balala pokteta aliba rongnung 3R ya ka lir. Iba linük nung 2013 küm nüburtem tsüngta rara tesashi adoka tang tashi azüdokshia arur.

Taoba küm December ita election nung Tir Faustin-Archange Touadéra ya tanaben shimteta liasü, kong vote agütsür shilem asem nungi ka dang tajembai iba election nung

shilem agia liasü. Iba election nungya 3R densema telungpur telok balalai timtem agütsü, aser iba mapang linük shilem asem sadanger shilem ana parnoki amokbanga liasü.

Iba sülen UN peacekeepers, Rwandan special forces aser Russian paramilitary tem teyari nung mitkartemi tsükchir kübok aliba tesem timba raksütet.

Iba linük nung tensa tamajungba akumba ajanga UN Security Council-i 'arms embargo' ita 12 atsülangtsü Brehostibarnü sangdonga liasü.

Telungpur telok balala nem nok-o-nü malizükdaksütsü nükjidong nung sangdongba 'arms embargo' ya taoba mapang sangdonga aliba den kasa sli, saka yangji mortars metendaksü.

Nok-o-nü tajung agi anünga aliba CAR mitkartem nem Russia-i 2018 nungi teyari agüta arur.

Russia paramilitary ajanga CAR nem nok-o-nü tilatem agütsür aser nok-o-nü ayokba tenokdangba nung maitdaksür aser CAR sepai tashi taitba kumdaksüba asoshi Moscow tenüng asanger.

CAR nung instructor 500 shi yoka lir, ta Russia-i ashir, saka UN nung mongintemibo sepai 2,000 shi alitsü akok, ta ashir.

Myanmar military lenirtemi emergency atsülangtsü

Yangon, Luroi/August 01 (Agencies): Myanmar nung military-i civilian sorkar atsüngtokba sülen ita trok shi lir armed forces tekolakbai Deobarnü, linük nung elections agishitsü aser tang emergency benoka aliba ya 2023 küm August ita tashi nung agintsü ta shiogo, iba ajanga linük nung military yimsüsüba ano ita 18 shi atsülangogogo.

State of emergency ya mezüngbo küm ka atema benoka liasü, koba taküm February ita Aung San Suu Kyi-i aniba sorkar atsüngtokba

sülen anogo ishika lir military-i sangdonga liasü.

State administration council-i (junta-i par telok dang ajanga nungja) "caretaker government," Ato Kilonser asütsü atema Min Aung Hlaing shimba tanga sangdong ka ajanga metetdaksü.

TV nung sangdong ka ajanga Min Aung Hlaing-i, military yimsüsüba atsülangtsü atema junta-i telemetba agiba metetdaksü. "2023 küm August ita tashi nung state of emergency agintsü. Ni multi-party elections ka kechi südir süaka tamakok maludaksü agitsü nangzükü," ta pai ashi.

Maneni paisa, linük dangi Association of Southeast Asian Nations' (Asean) indang special envoy den longjemer inyaksü junta renema lir ta ashi.

"Myanmar nung ASEAN Special Envoy den sensaksemtsüba densema ASEAN arrla nung ASEAN cooperation dak sendakba nung maparen balala inyakteptsü atema Myanmar renema lir," ta Hlaing-i ashiba news agency Reuters sangdong ka ajanga metetdaksü.

Myanmar nung mepetmesü adoker aliba bentettsü atema Asean lenisüba nung inyaksangshitsü tapet ta United Nations-i shiogo. Ajisüaka züngsem 10

agi kümetba lokti tentet nung Myanmar envoy asütsü asoshi nisung ka shimtsü atema telemtang adoker lir aser züngsem kari nisung ka dak nung tali shimtsü benokdangogogo.

Asean linüktem nungi foreign minister tem Hombarnü (August 2) senden ka amentsü, kong regional aser international ken o balala benoka sensak asemtsü renema lir. US Secretary of State Antony Blinken-a iba senden nung adentsü aser iba mapang pai Myanmar nung mepet mesü adoker aliba indang aser tzü mopung melenshiba dak sendakba nung onük balala benoka sensak asemtsü.

Kasa mapang nung Myanmar nung military-i srokar atsüngtokba sülen nüburtemi longkak aitba ajanga tensa mejungi kümogogo. Osang balala ajanga ashiba agi military-i tashiyim amshia longkak aiterrem nokdangtsü merang aser nisung 900 dak tema ketdangsürtemi tepsetogogo.

Assistance Association for Political Prisoners-i ashiba agi, tang tashi nung sepaitemi nisung 939 tepsetogogo aser longkak aitba nokdangtsü atema military-i nisung 6,990 puogogo, ta Reuters-isa metetdaksü.

(Maneni tapak 10 nung...)



France yimtiba, Parin nung nüburtemi COVID-19 mozü anema longkak aitba mapang longkak aiter kati French oshi nung "temeden" aser "vaccine passport magizükü" ta zülua bener jajaba angur. Mozü agia alirtem tesem balala nung senzüsü melaba, COVID-19 pass anema Deobarnü France kübok yimti balala nung longkak aita liasü.

TSÜNGREMMONG
2021

Online
KENTEN
TETOKTEPBA

SENPET

- * Finalist ajak nem mulungsü senpet (consolation) agütsütsü.
- * Tematiba jenjang 3 nguteterem atema ken Recording sütsütsü.
- * Takoker atema Music Video aser sen senpet agütsütsü.

OMEN

- *Tetsür jenjang ulushitsüba (Women Empowerment)*
- *Tetsür-tebur tebendang malitsü (Gender Equality)*
- *Tetsür tanur kümzükang, La nem tesayuba agüjang (Save the Girl Child, Educate Her)*

Nüngdakba teinyaktsü aser arlatem

1. Iba tetoktepba ya Mokochung District nung alir tejangrartem ajak atema alitsü. Arishi küm tatakter kecha mali.
2. Ken-ji Ao oshi agi pei sasa mejema atenba asütsüla aser temalen agüja aliba omen mashi ka nung ajemdaker yanglutsüla.
3. Lyrics den külemi ken audio recording-ji (kongki ola dena mesüra medeni asüyonga) WhatsApp Number: **8132829367 / 9862883980 / 9975811468** mesüra email ajanga **dicwmkg@gmail.com** nung pei tenüng, talidak tejangja aser contact number inoker yoktsüla.
4. Ken indang Copyright temedenji kentener/ken mejemer meyong alitsü.
5. Iba agütsütsü atema tatembangba anogoji **August 31, 2021** alitsü.

TETENDANGERTEM

1. Monglier, Asso. Pastor, MTBA
2. Aosunep Ozükum, Ken zülur & mejemer
3. Imtisenla Lemtur, Proprietor, Initio Academy of Music

TAYONGER

District Administration & District Level Centre for Women-Mahila Shakti Kendra (BBBP), Mokochung

Project ka nung Kiara Advani aser Ram Charan na longjemtsü

Mumbai, Luroi/August 01, 2021 (Agencies): Nüngtugu film director, Shankar indang pan-India film project tasen ka nung actress Kiara Advani-i south star Ram Charan den külemi shilem agiba angutsü, ta Honibarnü film yanglurtemi ashi.

2019 küm sayaba Telugu action movie "Vinaya Vidheya Rama" nung külemi shilem agiba sülen, project tasenba nung Advani aser Charan na tanaben longjemba angutsü. Producer Sri Venkateswara Creations-i sangdong ka ajanga, Advani arishi küm 29 ajungba anogomung nüngtem nung, la iba project nung aniokba osang sangoktsü.

"Tepor ajungba den sempet

balala aketba actress asoshi yongyar aser iba @advani_kiara den maangka tulu ajanga audience longjemtsü mapang agi tem atsüa arutsü aser imlar," sempettsüba asoshi pelar. Project tasenba nung, onoki la pelashishia agizüker," ta Twitter ajanga film yanglurtemi lemsatep.

Kiara Advani-i la indang taruba biographical drama "Shershaah" sayatsü asoshi renemdar aser lai ashiba agi, Indian film industry nungi artist takotet den külemi inyaktüsü asoshi yongyaseter.

"Film tentet nung ajaki jangjaa aliba nübu aser wadang tsütsü tajangshiba jenti alir nübutem den külemi inyaktüsü maangka anguba asoshi pelaseter. Project tasenba tangok tenzütsü

asoshi yongyar aser iba maangka tulu ajanga audience tem atsüa arutsü aser imlar," ta Advani-i lemsatep.

Shankar indang taruba project ya oshi asem - Telugu, Tamil aser Hindi nung sayatsü.

Sri Venkateswara Creations sabang kübok Dil Raju aser Shirish Garu nungeri iba project yanglutsü. Iba film dak alia, Advani-isa Karan Johar indang "Jug Jugg Jeeyo" aser Anees Bazmee-i direct asüba comedy "Bhool Bhulaiyaa 2" nung tongti shilem agiba angutsü. Ano külen, Charan-i S S Rajamouli indang period action drama "RRR" aser Telugu film "Acharya" nung pa tebu Chiranjeevi den külemi shilem agiba angutsü.



Deputy Chief Minister aser Home Minister Y. Patton den Nagaland Chief Secretary, Jane Alam aser department nung ketdangsürtemi July 31, 2021 nü Police Complex, Chumukedima nung tang tasen yanglua aliba Covid Hospital semdanga liasü. Iba mozüki nung COVID-19 agi shiranger anepalutsü atema yipten 75 lir.



MOPUNGCHUKET SENSO MUNG DANG

H.Q. Mopungchuket Village

P.O. Impur - 798615

Mokokchung, Nagaland

TENÜNGSANG AGÜTSÜR

Tawa Mopungchuket senso tajung shirnokisa pei wadang lenla balala nung khonang, naroka aser temaba jenjang ajangzüktetogo, parnok ajak nem Mopungchuket Senso Mungdang-i tenüngsang tetushi agütsür.

1. **Dr. A. Imsuyanger Ao, Chief Veterinary Officer, Longleng** : Indian Veterinary Association Conference (IVACON) sabang nungi pa nem "Best Field Veterinarian Award 2021" khonang agütsü.
2. **Atula Lemtor** : Sorkar tenzüka wadang nung temaba jenjang ajangzükteta Department of Industries and Commerce, Government of Nagaland nung Deputy Director mendeni ajungket.
3. **Wabong Guru S. Panyang Ozüküm** : Ministry of Culture, Government of India kübok Guru Shishya Parampara Scheme nung North East Zone Cultural Centre (NEZCC) ajanga pa nem "Guru in the field of Folk Song and Dance" naroka agütsü.
4. **Kibangsangla** : Sorkar tenzüka wadang nung temaba jenjang ajangzükteta School Education Department, Government of Nagaland nung ADEO, Tuensang mendeni ajungket.
5. **Nungshisongla Aier** : Sorkar tenzüka wadang nung temaba jenjang ajangzükteta School Education Department, Government of Nagaland nung ADEO, Mokochung mendeni ajungket.

Mopungchuket Senso Mungdang-i parnok ajak nem maneni temoatsü meshitsür aser Tulusang Tsüngremi parnok taküm, kibong aser wadang ajak nung len ania moajang ta sarasademtsür.

Sd/-
L. Tali Jamir
President, MSM

Sd/-
Tiasunep Jamir
General Secretary, MSM

OFFICE OF THE
DIMAPUR LONGPATSÜR TELONGJEM (DLT)

TENÜNGSANG AGÜTSÜR

Dimapur Longpatsür Telongjem (DLT) ajanga asen Longpa kaketshir shirnokisa HSLC, HSSLC aser CBSE 2021 tatidang nung takok tulu nguogo ajak dang pelaba aser tenüngsang agütsür. Maneni nenok azungba nung Tsüngremi moajangma.

Sd/-
(Chubasangla)
President

Sd/-
(Imnainla Nokdy)
Gen. Secy.

Jagannath dang kanga pelar: Anushka Shetty

Mumbai, Luroi/August 01,

2021 (Agencies): Actress Anushka Shetty-i film industry nung ajemoka inyaka arur sülen, Brehostibarnü küm 16 jungogo. Küm 16 tashi takok ngua inyaka aruba nüngtem nung, Anushka-i director Puri Jagannath dang pelaba lemsatep. Puri-i direct asüba Super' film nung Anushka-i actress ka ama mezüng shilem agiogo.

Iba film nung Anushka-i Nagarjuna den külemi tongti shilem agiogo aser July 20, 2005 nü theatre nung Super film sayaa liasü.

Instagram sabang nung Super' indang noksa ka den külemi, Anushka-i "Iba film nung shilem agir ajak nem tenüngsang agütsür aser ni yariba asoshi Annapurnastudios, Supri, Nagarjuna garu, Puri Jagannath garu, Sonu, Sachin (makeup & hair) aser team dang pelaba shisemer. Nenok teyari ajanga tanü ni iba jenjang nung nokdakteta lir. Küm 16 tashi industry nung inyaka arudang lenmang aisü nung team-i kanga nungita aruogo. Kü dak temulung lema aser amalitepa aruba atema nenok ajak dang kanga pelaba lemsateper," ta ashi.

Anushka industry nung ajemoker külen nungi team dak alaka, la nem teyari agüja aser nungita arur ajak dang lai pelaba lemsatepogo.

"Kü taküm nung temelenshi tulu adokdaksütsüsa, Hemchand, ASF aser audience



temi temeim tulu sayuogo. Nenok temeim kecha den asadangtsü makok aser iba atema kü mulung taroktiba nungi pelaba lemsateper. Tarutsü nunga maneni amalitepa inyaka aotsü imlaa atar," ta lai shisem. Acting maparen nung ajemoka Super nung shilem agiba sülen, south industry nung Anushka Shetty sempet ajaki jangjaa aküm aser actress tajung ka ama nüburtemi la agizük. Telugu aser Tamil film anaprongla nung lai takok tulu nguogo.

Horror film - Arundhati takok anguba sülen, Anushka superstar ka aküm. Blockbuster franchise Baahubali nung Anushka-i Devasena shilem agiba sülen, India nung nüburtemi la tenüng aser sempet kanga sapuadok.

Nishabdham nung Anushka Shetty-i tesüsa shilem agiba nguogo. Toaba küm Amazon Prime Video nung iba film sayaa liasü.

Tokyo Olympics: Zverev-i gold medal kokogo



Luroi/August 1, 2021 (TYO): Deobarnü Olympic nung tebur kija asaya nung Alexander Zverev-i, Karen Khachanov koka 1992 kum sülen tang mezüngbuba tennis asaya nung Germany atema gold medal ka koktetogo. Fourth seed asayar shibai semifinal nung Novak Djokovic tsükdakja liasü pai final asaya 6-3, 6-1 agi koka liasü.

1988 kum Steffi Graf-i gold medal akokba sülen Germany nung asayatem rongnung Olympic nung kija asaya nung gold medal akokertem rongnung Zverev tanabuba asayar

Iba mapang Sonu-i, 'Special Athlete' tem den parnok tebilemba asüdanga aser sensaksem. Saispong tsütsü parnoki shilem tajung agia takok anguba atema pai Special Athlete tem nem tenüngsang agütsü.

Iba session lapokdang, Sonu dang #WalkForInclusion indang m e t e p l a d a k t s ü . WalkForInclusion ya Special Olympics Asia Pacific Region indang mapatong ka lir, koba athlete temi shilem agiogo. Iba Special Olympics indang Inclusion Revolution nung Sonu denogo.

"Tanü anogo ya ni atema khenyongi balaka lir aser Special Olympics Bharat nung densentsüsa kü nem maongka tulu agütsüba atema pelar. Saispong tsütsü athlete temi takok anguba ajanga Special

Myanmar military lenirtemi...

Yimden yimsüsüba tsütsü mepetmesü tulu adoker aliba den bendenloksema linük nung Covid-19 wara agi kanga mejungi kongshio go kechiyong mozüki nung staff temi democratic sorkar ka pusema pei mapa sentoka toktsüba ajanga mozüki aika tazüng lir. United Nations indang special rapporteur to Myanmar Tom Andrews-i, taoba mapang wara dak sendakba nung kanga shisabulua bilemba aiben lemsatepogo. Tawa pai, military dang linük

kümogo. Graf-i gold medal akokba sülen kum pezü lir Boris Becker aser Michael Stich nati tarep asaya nung gold medal koka liasü.

World number five asayar yagi tang tashi Grand Slam ka danga mekokteti lir. Taoba kum US Open final nung Dominic Thiem set ana agi tejak dang ser asayaba sülen asaya makokba densema pai Grand Slam akoktsü atema maongka aika magiteti arudar.

Ajisüaka arishi kum 24 tain asayar-i Olympic nung takok ya 2018 kum ATP Finals akokba aser Masters titles pezü koker

Olympics Athlete shia dak tejangraba tanela aser tayongzükba balala kokteta aotsü temulungtetba tulu sayur. Parnok saispong wadang nung tajungtiba shilem agia aser takok tulu ajangzüktsü asoshi imlaa atar; aser alima dang parnok sempet sayutetsüsa tasüita inyaka aotsü ajungshir. Iba Special Olympics Bharat nung adentsü maongka anguba ya maongka ama ni agizüker aser linük nung nübur ajungai iba mapatong jangjatsü asoshi iba sabang tuluba yanglutsü kü mangdang lir. Ni SO Bharat aser Inclusion Revolution pusemer," ta Sonu-i ashi.

Sonu-i Special Olympics Bharat Athlete tem anir Special Olympics World Winter Games nung shilem agitsü sentong lir. 2022 January ita Kazan nung Special Olympics World Winter Games asayatsü.

"Iba Special Olympics World Winter Games atema Russia nung külem team pur rongnung adentsü maongka anguba asoshi nümatanga bilemer. Iba asayamung nung parnoki tajungtiba shilem agitsü asoshi asenok ajak longjemer athlete

nung mepetmesü adokba ajanga jenshir alirtem mesera longkak aiterem nem teyari agütsüba nung military-i teyari agütsüsa atema mepeshia asüngdangogo.

Aung San Suu Kyi February 1, 2021 nü nungi tenzüka military-i sota yua lir aser la anema ken o balala benokogo. Election atema nüboyimba mapang Covid-19 dak sendakba tenokdangba agütsür aliba sülen manidakba aser linüki ozüng alema walkie talkies bener aruba amala ken o balala la anema

aliba nung bendenloksemettsü.

Kasa mapang nung Wimbledon quarter-finals tonga asayaba sülen Khachanov-i Tokyo nunga kanga junga asaya saka final asaya nung pai kecha mesütet.

Final asaya nung Zverev-i aces trok aser winners 16 nguteta liasü.

Asaya mezüngbuba set tasembuba game nung Zverev-i Khachanov indang serve break asü aser break point ka kümzüka 4-2 agi tejakdang aküm.

Iba sülen Zverev-i game tekububa nung set point angu aser asaya akok.

World number 25 asayar Khachanov-i tanabuba set nung Zverev-i aibelen menatsü imlaa liasü südi, ajisüaka mezüngbuba game nung backhand winner ka züklokja Zverev-i akok.

Iba sülen Zverev-i asaya amokbanger asaya aser pa 4-0 agi tejakdang aküm. Khachanov-i pa indang serve break mesüda tsü game ka akok saka Zverev-i tanungba asaya ana koka gold medal angu.

tem ajungmesotsü. Parnok sempet ajanga India nunga tanungba nüburtem ajungmesotsü asoshi asenoki athlete tem nungittsü," ta Sonu-i ashi.

Special Olympics Bharat, Chairperson, Mallika Nadda-i, "Special Olympics nung adentsü asoshi onoki Sonu Sood jaok aser iba maparen agizükba asoshi pa dang pelaba lemsateper. India nung, Special Olympics mapatong tsütsü temelenshi tasen ka adokdaksütsü asoshi pai shilem tuluka agitsü aser alima tesem ajunga nung 'Intellectual Disabilities' agi timtemer nübutem pai nungita yaritsü ta onoki tamang akar. Taoba mapang nunga, Special Olympics Bharat mapatong tsütsü Sonu Sood-i lenmang balala ajanga nungita yariogo aser Special Olympics nung pai anir külem India athlete temi shilem agitsü asoshi yongyaseter. Intellectual disabilities' nübutem nem kasa maongka aser temeden agütsüba maparen nung Sonu Sood den longjemer takok ngua inyaksü asoshi teimla tulu lir," ta ashi.

(Tapak 8 nungi...)

benoka lir aser item aibelenitem atema la kum 10 dak tema tepuokdak ayutsü akok, ta AFP sangdong ka ajanga metetdaksü.

Maneni 2020 kum linük election koba Suu Kyi-i aniba National League for Democracy party-i koka liasü iba election nung vote million 11 dak tema tim mesü agütsü ta shia military-i sorkar aitsüogo, ajisüaka election commission-i election inyakyim nung tilateri ken o kar dak alaka ochi mashi inyakyim kecha sendaka mali ta shio go.

DDBA ketdangpur tasen shimogo

Dimapur, Luroi/August 1 (TYO): Dimapur District Badminton Association nung badminton asaya ajungkettsü nükjidong nung tenzüko go.

Senden nung Dr. George Thira tir, Zakabo v Rothoka general secretary, tatongtirtem: Felix Achumi, Yangmi Vashum, Er. Temjenwati Longkumer aser senyur Alem Pongen asütsü shimogo.

DDBA nung züngoksema aliba club 12 nungi züngsem kaka den advisory board züngsem pong, executive council ama shimogo.

Kasa mapang nung DDBA stadium, United colony (Nagarjan) nung teti asayartemi Dimapur Badminton Club ta nungja

agütsür club tasen ka tentetogo. Iba club ya district nung badminton asaya ajungkettsü nükjidong nung tenzüko go.

DDBA nung züngoksema aliba club tem rongnung Morning Shuttlers, Chumukedima, Feather Touch, Purana bazaar, Seasonal Shuttlers, Circuit house colony, Elite Club, Kuda Indoor Badminton stadium, Kuda village (Nagarjan), Shuttlers United Sakus Memorial College, Progressive Shuttlers, DC Court stadium, Morning Shuttlers, DC court stadium, Supper Shuttlers, Thaheku village, Tetseo College Badminton Club, Tetseo College, Chumukedima Shuttlers, Apache Club, Niathu Resort aser Fitness House Badminton Club, Darogapathar densema lir.

Tokyo Olympics: PV Sindhu-i bronzemedal kokogo



Luroi/August 1, 2021 (Agencies): India tsürtem rongnungi nungtugu badminton asayar PV Sindhu-i Deobarnü China tsür He Bingjiao koka tetsür kija asaya nung bronze medal koktetogo. 2016 kum Rio nung silver medal akokba sülen Sindhu-i Tokyo nung Olympic medal tanabuba koktetogo. Iba medal akokba sülen Sindhu ya India tsürtem rongnungi Olympic nung medal ana koktetba mezüngbuba asayar kümogo.

Badminton kija asaya nung linük nungi mezüngbuba gold medal akokba asayar akümtsü atema Sindhu kanga meranga asayaa liasü, ajisüaka Honibarnü semifinal asaya nung world no 1 asayar Tai Tzu-ying-i la tsükdaksü. Semifinal nung tamakok anguba dak alaka Sindhu-i iba asayamung nung set ka nung danga tamakok ngua mali.

Otsü tasen ka yangluba sülen mapang tatsüka lir Sindhu-i, "Rio nung silver akokba mapang ni tanur liasü. Nüburtemi kü dak

nungi aikabo imlaa maliasü. Tang khuret aser pressure tali liasü, saka aji tim dang. Taküm tajangshiba ya khenyongi balaka kechiyong kum aika süiaogo. Tajangshiba, asaya yimya dak sendakba nung kumtem tsüngda tatalokba aika ajangshiogo. Idaki medal ka koktetba ya ni atema jangrademtsüka lir," ta ashi.

"Ni kanga pelar. Iba asaya metenzük tsüngda tebilemba aika liasü. Final metongtetba atema jashitsü asü ano maongka ka ngutetba atema pelatsü, aji mejangjai liasü," ta Sindhu-i ashi.

"Yashibo ni kanga jashia liasü, saka kü indang coach-i kü dang ano maongka ka lir ta ashi. Bronze medal anguba aser jenjang pezüba nung tembangba na tsüngda tebandang tulu ka lir," ta lai shisem.

"Iba takok asoshi kanga meranga inyakogo aser meranga inyakba tajangzük ajangshiba mapang mepet nung lir ama bilemer," ta Sindhu-i ashi.

BILEMDANGANG

"Mekoksümongi khu benra mokseptsü."